All' ultimo dei cittadini, al men fornido de studj, de lumi, de cognizion e de scienza, massime pratica di governar, non convegnirave certamente el presentarse al serenissimo supremo Mazor. Conseggio a versar sulla trista condizion calamitosa, ma rimediabile, dei tempi presenti nei pubblici e privati interessi.

Ma se certa è la necessità de rifletterghe, nessun maggior e in autorità e in cognizion presentandose, dopo aver principalmente prevenudi i animi dei mii cittadini de questa mia umile devota comparsa, dopo averne prolungà el momento, dopo averlo diferido d'uno in altro zorno, d'una in altra stagion, onde pur veder, se altri zelanti del ben de sto popolo volesse montar su sta renga: Se el nostro stato deplorabile, ma non senza rimedio, non forma impression su i altri, sia lecito a mi finalmente el parlar.

Non parlarò del commercio languente: el stato della nostra piazza, el numero, le forze dei mercanti, la mancanza, i fallimenti continui lo indica. L'eccessivo incarimento dei viveri fa,
che le man poste in opera per le manifatture s'abbia a pagar
eccessivamente. De quà ne nasce costar a caro prezzo le nazionali manifatture. Se nei esteri paesi le se manda, l'estero che
trova le soe a più bon prezzo, non le vol; se se crede de esitarle
nel proprio paese, chi vorrà mai renunziar al vantaggio ch'el
trova nel comprar i esteri lavori, per provederne delle nostre
manifatture più care? De qua ne vien, che resta oziose e senza
lavoro le man del vostro popolo. Tutto è senza regola, tutto è
disordine. Quelle famegge, quei averi, che i vostri progenitori
faceva bastar e per mantegnirse e per prestarse in servizio della
patria, adesso appena nella più rigorosa economia le basta per
viver.

Da ste cause, come non ha da derivar alienazion dei matrimonj, estinzion delle famegge, restrizion del corpo aristocratico?
Le più cospicue, le più antiche, le primarie dignità della repubblica ricusando le giace nel più tristo avvilimento. El popolo,
che impiegando una volta la so vita, i so bezzi nel lavoro, nel